



漱玉齋類詩目錄

卷下

野興六言絕句 十六首

田家

郊遊

典衣

觀魚

山行

採藥

採茶

泛舟

栽花

種竹

採蓮

採菱

漱流

枕石

晏起

獨吟

擬古宮詞

一百首

長安少侯行

長安老山人行

琵琶亭歌

易水歌

羅浮歌送韓孟郁南歸

天目歌送李伯遠之臨安學博

古松歌度梅關賦

叢竹歌爲黃敦柱年丈賦

登羅浮

二首

泛溟渤

二首

題白燕託閨情

題黃鸝託詠俠少

和吳翁晉梅花詩

十三首

羅貢曲

四首

長干行

二首

張孟奇徐鳴卿招同黃貞父李伯遠湯嘉

賓畢孟侯蔡敬夫韓孟郁劉百世陳元朋

米仲詔西郊李將軍園社集得天字排律

三十一韻

五子雅集倡和詩三十韻

并序

與韓孟郁夜坐論詩詮敘其意得五言排

律六十韻

漱玉齋類詩目錄卷下終

漱玉齋類詩卷下

東粵鄧雲霄玄度甫著

野興六言絕句十六首

并序

都門三載需次無期微尚日覺磷緇浮
生豈同金石夢裡故山非遠閑來野興
如飛思往事以沉吟揮短章而洩蕙言
存本色雖俚何慚

田家

戴勝啼殘宿雨荷鋤斲破春雲壚側新添數甕

杖頭無用半文

郊遊

西日無情自去東風有意相迎
青草池邊放鶴
綠楊堤畔聽鶯

典衣

鶴氅王恭任好鸛裘司馬非貧
一醉醺醺長日
百年鼎鼎何人

觀魚

無意把灘頭釣有屋名濠上
居樂處自來自往

會心非我非魚

山行

野老今朝興動山僧昨日書來
白雲一片扶杖
明月千峰入杯

採藥

數畝龍耕瑤草幾枝雲護琪花
毛女洞前覓路
羽人門外停車

採茶

童子纔安鐺曰東風已展旗槍
幽徑踏雲自撥

品泉邀客同嘗

泛舟

烟水惟便小艇風波不到閑身好對輕鷗野鶴
休論漁父秦人

栽花

換土栽培香國圍欄粧點花神前世河陽仙吏
別號漢陰丈人

種竹

君子珊珊蒼玉佳人楚楚綠衣五月秋聲先到

七賢酒興同歸

採蓮

流水周於舍下輕舟自到門前暑服新披白葛
吳歌去採紅蓮

採菱

淺浦碧莖繞楫深溪紫角迎船漢女江妃有意
清風皓月無邊

漱流

鳥外晴川練光花底清流錦色漱餘磯畔潺湲

洗盡胷中荆棘

枕石

閑來直是眠雲靜寄非關醒酒不知苔色侵衣
一任松花覆首

晏起

婚嫁全不關心理亂何曾到耳烟霞半覺華山
蝴蝶一簾莊子

獨吟

興到溪山金美吟成神骨雙清誰分天籟人籟

或似泉聲鳥聲

擬古宮詞一百首

并序

夫人臣之義不敢齒路馬問溫樹蓋言
慎也至於詩則尤當爲尊者諱惟援古
以寓諷消怨而忘怒庶幾得之昔之騷
人志士侘傺鬱往往託之宮詞閨怨
洩其懷君憂國之想故屈平寄思於佚
女元亮起興於閑情彼固有所託非苟
而已也所託深則短什爲吉光之片毛

所託淺則累牘爲專車之朽骨若仲初
花蕊者流詞疊意複不過宮中日記簿
耳事實填委興寄都絕令人覽未半而
欲臥何取於滿百也且仲初以外臣輕
言禁近幾爲中涓所持孰若附於古以
發端則代異事殊得失互見美刺並陳
言之者無罪聞之者足思此余所爲擬
古意也豈敢謂興寄遠追古人若彼疊
詞複意余知免矣

萬國朝元捧聖君烟開仙掌煖氤氲九天初上
重光日三殿長飛五色雲

其二

北斗低垂倚禁城南山當殿更分明合宮共祝
齊天壽鳴珮遙聞動地聲

其三

夜半君王八駿回雲璈仙管遍相催瑤池賸有
青鸞使侍女休歌赤鳳來

其四

獸集長楊幾萬蹄君王校閱御園西妾身不憚
當熊立懶向樓前看鬪鷄

其五

玉輦看梅愛淡香宮中皆學壽陽妝冰肌玉骨
亭亭遠何用雙蛾若許長

其六

太一祠前散晚霞蒲壇燈燭映鸞車九枝斜挂
重輪月獨炬偏開四照花

其七

君王齋戒集靈臺玉露金莖不滿杯宮裏琪花
千萬樹那能承露一齊開

其八

晚風太液折紅蓮百尺龍舟水拍天曲罷乘風
欲飛去綉裙還得號留仙

其九

千年花樹憶仙家好向雙成學種花紅頰緋袍
鎮長在肯將秋色換春華

其十

宮中雨露本無私何意偏開向日枝聞道侍臣
開講幄多陳樛木詠螽斯

其十一

上苑鞦韆笑語同湘裙羅襪遠行空昔傳妙舞
能擎掌今見仙姬解御風

其十二

團扇輕搖水殿涼巧裁明月繡鸞皇不愁盛暑
催香汗祇恐薰風不久長

其十三

年來種竹傍瓊軒浮碧垂陰滿院門旭日自宜
停鳳侶東風還待長龍孫

其十四

百花宿霧煖猶含蜂蝶紛紛曉已酣欲寫春山
入眉黛近來雲氣救終南

其十五

百丈崇臺接太清低枝月桂掛簷楹今朝宮監
逢人說親聽嫦娥嘆息聲

其十六

花陰翠輦轉遲遲宮扇低迴碍柳枝恠底才人
不輕折君王偏念發生時

其十七

白茅方士奏靈符十畝齋宮四面湖好借琴高
金色鯉妾將騎去問麻姑

其十八

殘柳縈烟鎖翠眉御溝流去杳無期縱然紅葉
能傳信不及東風嫩綠時

其十九

鳳樓初闕獻俘回賜宴功臣畫閣開從此琵琶
消怨調燕支新進美人來

其二十

銅壺銀漢水相連宮漏微茫落遠天點點繁聲
那得盡故將長夜續如年

其二十一

人在蓬萊閨苑中由來弱骨有仙風蓮花不染
空潭水何用防閑託守宮

其二十二

水殿花深鬪鴨欄紅雲綠樹倒微瀾鴛鴦鷺鷥
紛相逐誰侍龍顏倚檻看

其二十三

報道歌樓怒偃師六宮長袖盡遲疑聖人正奏
虞韶樂學士休裁舞馬詞

其二十四

夢中據腹是蒼龍醒後遙聞萬戶鍾記得銀屏
隱香霧高唐回首恨雲封

其二十五

生來歌舞自能諳舊住揚州傍綠潭忽聽採菱
翻艷曲令人腸斷憶江南

其二十六

休沐經旬半理粧喚隨歌隊過平陽游絲百丈
牽宮樹底是春情似箇長

其二十七

玉華斗帳近承歡寶枕携來號六安細雨和風
自然煖不知簾外有春寒

其二十八

年年脩禊浣平沙太液烟波駐翠華已遣少兒
爭鬪草更教宮女作司花

其二十九

上元烟景逐年新幻出金鰲捧紫宸火樹萬花
光似晝何須剪綵貼宜春

其三十

雲母屏風瀟月光涼於秋水白於霜深宮寂寞
如瓊宇莫遣清輝到玉床

其三十一

溫泉煖室養花枝二月新瓜已恠遲誰道東皇
入清禁南墻幽草未曾知

其三十二

芙蓉錦帶拂菱花寶靨雙雙鬪麗華不畏秦臺
能照膽却疑明月是儂家

其三十三

飛螢過盡錦屏空悵悵雙星一水中自是君恩
若流火秋來長夜在西宮

其三十四

獨立銀塘夜寂寥
芙蓉相倚背風颺
秋深自解寬衣帶
不爲君王好細腰

其三十五

懶將薄命苦悲傷
天地無心莫較量
唐死恩光看放蝶
晉宮車駕本隨羊

其三十六

春日晴曛錦繡堆
相期女伴上歌臺
瑣牕粧罷看蟾子
已報君王中使催

其三十七

金屋沉沉懶探春
玉階行倦臥花茵
將雛命侶雙飛燕
打落青虫故中人

其三十八

裸游新館映清波
長夏涼風澹綺羅
日晚散歸金鎖合
月明腸斷夜舒荷

其三十九

桂宮初見羽旂還
願乞餘丹駐妾顏
不惜妾顏薄西日
長承君壽比南山

其四十

塵流阿閣怨閑居
彌子龍陽樂有餘
今日不須誇矯駕
他年終見泣前魚

其四十一

射蛟鞭石總荒唐
翠輦頻年到海旁
誰識神仙無定寄
宮中亦有杜蘭香

其四十二

淡雲籠日醉花天
紅雨侵階點綠錢
人柳春來如妾懶
晝長無事但三眠

其四十三

判斷春光太有情
柳眉桃頰笑相迎
也知殿角新雷響
不及君王羯鼓聲

其四十四

夜來急雨春風喧
霽後梨花滿院門
試向上林聽百舌
始知鸚武未多言

其四十五

宮中寒食賜金錢
共對餠糕憶往年
可恠御厨猶禁火
玉堤芳樹自含烟

其四十六

下來蠶室繰新絲心緒纏綿春日遲不及採桑
南陌女雙蛾何用似人眉

其四十七

照影池邊繡領斜踏青同步御溝沙昭儀欲佩
宜男草囑爾先栽夜合花

其四十八

淋池流水日湯湯清淚猶隨出禁墻已見西風
生殿角不須製曲更招商

其四十九

黃姑渚畔夕流深牛女相期此夜心共道天孫
因巧誤懶排瓜菓學穿針

其五十

凝碧池邊玉笛聲長生殿裏結盟情愁心欲向
彈棋寫祇恐心中自不平

其五十一

遙傳輦度萬年山漫倚東風想珮環細數落花
無限恨心隨流水到人間

其五十二

東風送煖動輕綃新創秦樓待品簫聞道侯家
尚公主玉書先遣鳳皇招

其五十三

瑣牕秋盡度流螢誰道長門次掖庭日日焚香
兼洗鉢祇須朗誦法華經

其五十四

誰對螭頭近御筵邇英簾下集羣賢起居注罷
簪彤管女史頻催索彩牋

其五十五

東君迴馭百花闌萬戶春深鶯舌殘魏紫姚黃
都賞遍沉香誰更倚欄干

其五十六

尚衣初進縠紗裳夏樹陰陰送嫩涼羞把雙眉
裁柳葉亂絲飄蕩過南墻

其五十七

渥洼神駿自西方一入天閑首藉香莫恠新粧
梳墮馬君王昨日御乘黃

其五十八

中元佳節月華清
懶拍銀盆弄化生
莫信宮門纔咫尺
還如弱水繞層城

其五十九

春朝太液煖溶溶
新水微茫混碧空
曉霧飛爲神女雨
長橋化作美人虹

其六十

梨園弟子鬱金裙
法曲聲高響入雲
月裏曾教青女習
人間莫遣李模聞

其六十一

影娥池畔月如霜
水碧沙明杜若香
宮女迴波歌楚調
却疑行幸到瀟湘

其六十二

露重參橫春夜遲
不眠斜倚萬年枝
花影正須留月姊
花心更好媚風姨

其六十三

願隨王母步天庭
掃地時窺玉札經
撲罷舞衣浴明水
霞冠秋禮一壇星

其六十四

朝來池面靜無風繞岸樓臺落鏡中不信鰲頭
擎貝闕請看波底有龍宮

其六十五

誰家巧女上鴛機纔見柔柔又葉飛南國綺紈
新入貢侍兒相勸易寒衣

其六十六

砧聲別院響沉沉蛩透紗牕鵲繞林惆悵秋衿
涼吹入君王空賜辟寒金

其六十七

月浸珠簾徹底清銀床冰簟夢難成秋空萬里
無雲氣桐葉翻塔作雨聲

其六十八

羣鷄隊隊錦翎張玉案旁邊立賈昌角勝何須
金作距禽心亦自妬專場

其六十九

上林秋盡兔狐肥游獵平原駕未歸細草有心
承玉珮新霜莫遣濕龍衣

其七十

屬玉雙飛太液池採蓮宮女畫船移蓮房顆顆
看相傘若箇心中不帶絲

其七十一

白苧聲高秋夜長誰移明月在昭陽
曾臺綵女羅衣薄舞罷盈盈兩袖霜

其七十二

池中鋪錦埒鋪錢水陸行遊各麗妍
隊隊紅粧隨豹尾少兒沿路拾金鈿

其七十三

栢殿蘭臺秋興高詞臣侍宴賜揮毫
斜飛墨霧鸞牋濕賦就何人得錦袍

其七十四

亘地毘瑜戲綵毬至尊含笑賞先籌
鸚鵡杯前香似霧杜鵑花外月如鈎

其七十五

月冷霜清桂樹丹琉璃瓦上動微瀾
雙雙白兔眠簾下誰道深宮異廣寒

其七十六

院裏霏霏三素雲却疑前世是元君金錢不買
長門賦玉版親書寶籙文

其七十七

天上人間迥不同觀名却月殿迎風玉皇遙在
紅雲裏十載深宮似夢中

其七十八

寶匣擎來綵勝新金刀繡線占陽春中宮傳諭
加粧點先賜椒房戚畹人

其七十九

御堤南望草萋萋一半花香落燕坭玉輦不來
春又暮誰云桃李易成蹊

其八十

高高複道勢凌空步輦行遊躡彩虹香屑霏微
侵苑外歌聲搖曳落雲中

其八十一

萬紫千紅鬪歲華玉堤堆錦又蒸霞春來秋去
深宮裏惟有菖蒲不作花

其八十二

春院傳柑賜內官金相玉質映雕盤喜看葉帶
青雲濕更憶枝垂白露團

其八十三

荔枝盧橘自南來赤日黃塵驛使催修貢誰憐
飛騎遠薦新今見寢筵開

其八十四

水殿清波漾舞巾輕盈羅襪不生塵好邀西子
湖邊月更照陳王賦裏人

其八十五

哀蟬落葉送秋聲聖主新歌最有情不恨香魂
迷帳幙更催方士訪蓬瀛

其八十六

承恩有路到陽臺蘭夢無徵試墮釵偷望前星
占氣色夜斟玄酒禮高禰

其八十七

千門萬戶望中賒歲歲風吹御苑花聞道畫工
隨內使又分十道選良家

其八十八

驪岫登高輦路長行宮九日賜萸囊莫言啼鳩
芳菲盡黃菊叢蘭各占香

其八十九

大駕迎春耕籍田三農九扈頌豐年新雷隱隱
隨鸞輅龍袞猶沾綠野烟

其九十

三千粉黛各傾城誰得君王喚小名但願身輕
如燕子更調歌噪學流鶯

其九十一

鷓黃札札弄金梭織就花叢似綺羅遊遍六宮
催秉燭春光九十本無多

其九十二

蒲針柳線拂橫塘避暑乘涼過上陽閑把玉環
牽吉了更將金彈打鴛鴦

其九十三

獸炭金鑪似火城紛紛瑞雪灑雲屏如今不是
陳時世玉樹驚看照後庭

其九十四

睡鴨香銷烟靄濃化爲雲氣總從龍誰知一片
簾前雨遠隔巫山十二峯

其九十五

班娘纔退趙姬升賣賦還聞聘茂陵一任君恩
他處煖妾心元在玉壺冰

其九十六

東宮花燭照芳春鶴馭鸞車迓玉人今夜洞仙
三十六爭看織女度河津

其九十七

君王偏愛廣寒遊霓羽聲喧桂影幽醉把玉鞭
空外指綵雲中夜度揚州

其九十八

圍欄換土護花王愛爾春心不着忙紅玉一枝
藏玳匣百花開盡始成粧

其九十九

綠陰千頃洗殘紅吹笛池邊起晚風折柳不須
悲舊曲飛花猶得入南宮

其一百



原件短缺

22-23

身在天皇玉案前自誇無事小神仙宮中一日
如千日聖主長生更萬年

長安少侯行

長安大道逢少侯傳呼冠蓋若雲浮扇開翡翠
明金勒香逐檀旃控紫騮借問君侯年十幾仙
居甲第阿那裏笑指皇城東北陬瓊樓綺閣中
天起自言乃祖識真龍先建麒麟第一功鐵券
金章聯奕葉生年二八有重封椒房戚畹姻連
理十世分茅三尚主西館金張未敢窺東床趙

李爭相取新娶佳人十五餘金塘春水映芙蓉
綠珠碧玉隨爲勝掩面含羞捧珮琚嬌歌妙舞
青樓晚火樹銀燈宵徹日帳底鸞栖楚雨濃釵
頭燕躡巫雲散平明步入明光宮劍舄橫衝豹
尾中黃帕籠盤傳賜食緋衣中使競趨風歸來
門巷紛車馬半揖公卿盡爲亞灌夫罵酒寂無
言強項董宣先肯下豪雄意氣騁遨遊七國三
邊不解憂自負魏其新得寵誰憐李廣未封侯
錦袖珠袍搖白晷道旁觀者皆辟易富貴何曾

識一丁太玄閉戶知何益

長安老山人行

烟霞自逐長安杖鶴怨猿愁空蕙帳周獵希尋
渭水竿漢庭已厭商山相耳聾不覺市朝喧日
暮愁過七貴門秋色迎寒貂已敕談鋒罷戰舌
猶存近來年少氣如雲眼底綈袍孰識君堪嘆
出山泉水濁當年未讀北山文

琵琶亭歌

九江之下通揚子九江上接瀟湘水湛湛青楓

江上愁春心極目傷千里湘北朝霏巫峽雲湘
南秋色洞庭分白蘋暗結三閭骨班竹輕搖帝
女裙湘波迢迢長沙眇逐客千年幾相吊漫道
懷王惡直臣寧知漢主輕年少騷人遺淚落潯
陽司馬琵琶更斷腸哀音似倩江流咽彩筆長
懸日月光有客扁舟楚水湄琵琶亭下重相思
荻花楓葉長如舊紅袖朱顏又一時渡江北望
長安路逐客江南近無數零落天涯杳不聞摧
殘何異商人婦古往今來共寂寥感時懷古旅

魂銷便欲吹笙騎皓鶴匡廬五老坐相招

易水歌

飲馬臨易水清波照客心平生仗俠骨誼重輕
千金匣中劍動蒼龍氣化作白虹光燭地萬古
荆軻不死魂拍手哀歌招復起昔日燕圖在掌
中寧知草澤無英雄逢人爭博多目攝風色蕭
蕭心欲折擊筑時從市上遊勸君須向酒徒求

羅浮歌送韓孟郁南歸

若有人兮思羅浮騎南鴻兮排高秋風蕭蕭兮

木正落暮雨急兮愁雲稠君暫停兮夷猶泥滑
滑兮易摧輶况僇僕兮瘦馬又救盡兮貂裘問
君囊兮幾何止蒯緱兮無多彈長鋏兮空返同
誰散髮兮山阿山阿兮寥泐洞銜星兮岩挂月
山鬼哭兮蘿深鷓鴣啼兮竹裂玄熊綠羆獐目
舔舌烟結翠沉徑嶮人絕念幽栖兮骨冷忽慘
別兮腸熱君山中兮茹薇手一編兮掩扉石潭
黑兮龍蟄高梧老兮鳳饑意不樂兮強牽衣傷
逋客兮久未歸臨風况兮浩嘆魂九逝兮先飛

爲我謝兮安期雲車來兮何遲遲君行邁兮歲
將晏日復近兮長安遠時不可兮再少君毋徒
兮偃蹇

天目歌送李伯遠之臨安學博

越山高越水長越天萬里吞南荒絕嶠東西開
兩日中天日月懸晴光照破鴻濛視太古轉盼
中原一杯土雲霞明滅映天台岩壑軒翔壓天
姥洞中仙鼠飛白鴉玉芝茁茁森於麻流泉瀑
布奔深澗昭明翻經曾洗眼唐代瓊宮結構存

漢皇龍簡精靈遠灝氣微茫上太清山麓下接
臨安城臨安之城大如斗不意近入李君手峰
影澄明落泮池擘頤爽氣當牕牖龍飛鳳舞古
記之片氈携去休攢眉勿論桃李待時雨喜得
烟景迎新詩君來已貴長安紙君去佳名滿人
耳灑筆振衣第一峯可念同盟者諸子君不見
馬融絳帳非虛設鄭虔妙技稱三絕丈夫垂名
動萬年此心肯向傍人說青袍黃綬且夷猶白
雪陽春若與儔知君雙目如天目一笑山空水

自流

古松歌度梅關賦

梅關夾道多古松老龍鱗鬣爭摩空恠鳥時呼
幽壑風濤聲萬派山洶洶客行八月方病暍蕭
瑟對此如寒冬蒼顏可入韋偃盡行者息肩騎
者下亭午颼颼竿籟清太陰黯黯雲雷掛日輪
月馭迴高枝木魅山精避深夜君不見泰山頂
徂徠巔棟梁剝落大夫老至今芳譽流青編何
如嶺外衝南斗粵天浩蕩開元後傳聞植自曲

江手

相傳松乃唐丞相張九齡所植

嶙峋氣節俱不朽神明呵

護當再拜仰止高山幾回首松上懸絲下有苓
花香葉苦通仙靈誰能築室依岩扃花可釀兮
苓可烹科頭箕踞烟霞裏下看度嶺人如蟻往
來名利空老死投簪服食果宿諾我欲從之赤
松子

叢竹歌爲黃敦柱年丈賦

火旗猷猷行高天迸泉驅汗氣如烟我來解帶
虛堂前蒲庭蒼靄秋颼然羨君叢竹瓊闌邊能

使子猷看不足娟娟翠袖籠寒玉
蒼鬱光浮緗帙青檀欒色泛金尊
綠勸君斟竹葉爲君歌竹枝清陰
疎影何離離棋聲琴韻宜風吹莫
言節苦夏蟲避莫道叢卑鳳不至
龍去須驚化杖時雪深方見凌雲
器君家縹管有輝光篇翰長懸汗
竹香賦就仙聲來嶰谷夢迴明月
在瀟湘七賢掃徑堪爲友狂來潦
倒非關酒最愛堂空客散後山童
剝笋敲茶白憐君意氣本清真冰
簟藤床對綠筠從今日日相過熟
看竹何須問主人

人

登羅浮

二首

萬里罡風吹鷓冠扶桑碣石倚筇
看乾坤一指浮空界日月雙珠在
曉盤雨過黃龍初返洞黃龍
洞烟銷玉女靜臨壇玉女尋真丹竈行應得未
信刀圭不羽翰

其二

朱明巖壑洞天遙樓結青霞傍斗杓
山有青霞樓呼吸可能通帝座嘯歌猶聽和鸞簫
上清縹緲無

今古下界蒼茫自暮朝不用登高誇作賦游仙
須奏白雲謠

泛滇渤 二首

謝傅輕舟與眇茫圖南人挾大鵬翔六鰲自湧
三山動四瀆終輸百谷王且慢迴帆歸小虎小虎
港直將散髮到扶桑鳴榔一笑人間事驅石何
因解作梁

其二

落魄高陽一酒徒幾年清夢寄江湖觀濤秋壯

枚乘筆擊楫風傳海若呼遙禮東皇斟北斗更
窺鮫室探驪珠蓬萊山下曾清淺問訊麻姑近
到無

題白燕詠詠閨情

舞向東風縞帶揚水精簾戶映新粧匣中釵冷
凝寒玉樓上床空度曉霜束素纖腰憐趙后入
關華髮憶班郎妾家已隔烏衣巷王謝堂前是
故鄉

題黃鸝詠詠俠少

西園公子尚輕肥金縷新裁作舞衣問柳朝尋
韋曲去看花晚自上陽歸閑依芳樹調簧舌寧
恤空閨咽錦機正是林塘多樂事王孫珠彈到
來稀

和吳翁晉梅花詩十三首

疎影千雲百尺長東風一夜入含章庭森玉樹
渾無葉雪度瑤池却有香淑氣潛回迎獻歲幽
姿迥出檀羣芳寄言二八樓頭女若箇新粧勝
壽陽

其二

彼美珠袍白氎巾翩翩高步自殊倫若非海外
煢霞客定是林間捉麈人霜雪任教侵傲骨溪
山真合老閑身對君如坐冰壺裏懶逐漁舟去
問津

其三

芳訊迢遙竟若何隴頭緘意待君過西施窈窕
無裝束衛玠清癯怯綺羅小苑孤眠和冷月橫
塘斜立遡微波莫嫌開處寒仍歛占斷春光不

在多

其四

近識仙人萼綠華
娉婷疑在太清家
洗粧銀浦消殘黛
種玉藍田吐瑞花
春信欲傳青鳥使
香風遙隔白鸞車
羞隨桃李同門徑
日暮低枝倚狹斜

其五

憐爾花神徹底清
曉風拂檻報平明
却嫌荀令香還重
更笑湘妃態未輕
霜冷天高衣袖濕
參

橫月落夢魂驚
忽聞荒戍吹殘角
腸斷空山半夜情

其六

獨持風格見孤標
不學脩眉與細腰
近水宜承交甫珮
傍山應掛許由瓢
折來霜月憐香淡
寄去鄉關怨路遙
祇有幽蘭湘浦上
芳魂千里可同招

其七

脉脉春心結萬重
憑欄不語若爲容
共誇賓客

盈金谷誰識天人下玉峯縞帶翩翩低復舉翠
翹縹緲淡還濃也知不雜陽臺雨塵夢無緣莫
浪逢

其八

難道春歸物物同北枝猶自怨東風愁雲匝地
寒無影飛雪迷天望若空取醉徑須浮大白尋
芳何用覓殘紅貯香換骨誰能事榮落應知屬
化工

其九

嫩綠平原半未勻餘寒蜂蝶敢相親誰知他日
調羹手元是高齋臥雪人環珮輕搖乘好月瓊
瑤碎踏亂香塵六街車馬應無數空谷孤芳孰
探春

其十

東閣裁來大幾圍古今清韻眼中稀應憐國色
羞紅粉始信山人是白衣曠野蕭疎幽興發閑
堂寂靜宦情微五陵年少如相問不用披輕更
策肥

其十一

何處寒花拂曙暉
行春相見轉依依
雪深庾嶺書來少
水遶孤山客到稀
乘興移尊臨浦岸
留香掃地鎖郊扉
青皇爲惜冰肌瘦
莫遣飛飛亂點衣

其十二

凌風卻月盡荒丘
何遜多情戀舊游
借問弄珠來洛浦
能如騎鶴上揚州
年年春到催花發
處處風吹逐水流
回首別離心欲折
數聲長笛倚

危樓

其十三

有女懷春日暮時
淡粧獨立嗅寒枝
柔腸暗許檀心合
艷質休教柳眼窺
顧影簷前聊索笑
傾筐樹底重相思
可憐清絕無塵染
魏紫姚黃總不知

羅噴曲四首

桑葉綠如烟
春蠶對妾眠
吐絲何太苦心緒
兩纏綿

其二

窓外芭蕉雨空房冷似秋夢來雲水濶客子在揚州

其三

昔別秦淮岸停橈綠樹邊傷心江上水不敢問來船

其四

拔却宜男草休栽夜合花粧成嫌艷冶宋玉在西家

長干行

同住長干陌經年來往稀採蓮相借問並着畫船歸

其二

歸去好相邀君家近或遙橫塘斜宛轉綠水浸紅橋

張孟奇徐鳴卿招同黃貞父李伯遠湯嘉賓畢孟侯蔡敬夫韓孟郁劉百世陳元朋米仲詔西郊李將軍園社集得天字排律

三十一韻

出郭春心淨，眇然郊原晴。綠草如烟金，銀遠寺
 雲霞外。松栢諸陵日月邊，南陌游人紛雜。選西
 山爽氣自澄鮮，魚吹弱藻，窺瓊珮。燕蹴香泥落
 錦鞵。公子鬪鷄隨蹋鞠，佳人拾翠上鞦韆。紅塵
 難覓虛無界，青甸遙尋小有天。梓澤侯家開別
 業，蘭亭春讌集羣賢。聲名入洛人爭重，詞賦遊
 梁各競妍。太白前身金粟佛，惠休今世玉堂仙。
伯遠四愁高詠心遊岳，千頃虛襟思湧泉。
嘉賓

公榦西園多駿藻，偉長鄴下富鴻篇。鳴琴心

盡入中郎調，酒態驚看吏部眠。敬夫醉後蒞書

殊矯矯，草成琳檄自翩翩。仲詔出奇趙幟誰能

拔，高議雲臺我愧先。孟郁百里應占星，金聚連

城今見壁相聯。天垂柳幕供行帳，風掃花茵擁

列筵。曲度松濤歸晚浦，觴重蘭氣對晴川。拍浮

簪紱渾如寄，潦倒形骸信可捐。竹下圍棋非賭

墅，林間揮麈到忘筌。太常浪說真持戒，繡佛長

齋豈入禪。白眼徑宜呼白墮，青州何必減青田。

伴狂自適賢人意妙趣難教醒者傳已見携壺
還荷鍾更聞騎馬似乘船酒龍沉醉和雲臥仙
茗清泠帶月煎渴吻頓消神皎皎睡魔潛去腹
便便催詩走筆驚銅鉢得句流霞映綵牋可道
元兄如季弟誰居王後讓盧前千秋大業壇方
建五字長城壁愈堅曼倩金門虛執戟子雲玄
室負懷鉛蛩吟自覺難成響牛耳看君遞操權
休向傍人誇貴紙須知古調在無絃

五子雅集倡和詩三十韻

并序

夫易美如蘭叶契同於臭味詩歌伐木
相求應若嚶鳴故離則有停雲之思合
則有班荆之好綈袍念舊豈渝霜雪之
零鷄祝定盟孰改雨風之急要以誼存
鮑叔論挫孝標敢謂素交盡乖季世緬
予七子各足千秋把臂甲午之年結社
地壇之署援青松而指白水片言不假
盤墩誓結綬而慶彈冠八拜已堅膠漆
論文聚樂人同鄴下之游抒志獻規飲

戒竹林之放陶陶永夕搔背而親短檠
款款忘年逆耳豈嫌攻玉謙而能下則
君苗之硯可焚和者實難則崔顥之章
獨步一時意氣真期接翼鵷鸞十載浮
沉堪嘆分岐萍梗不虞神物再合延津
撥開京陌之塵乍覩故人之面悵我久
淹郎署羨君金上公車雙眼偏青髻縷
問添多少寸心自赤河山邈隔存亡起
南竟乏楊意之逢筆耕無地靜卿虛負

徐君之諾劍挂何枝相對五人益思昔
日山陽聞笛空洒淚以沾裳岡上臥龍
想高吟而抱膝欲破涕而爲笑覺歡伯
之有權更話舊而尋盟倩麴生以作主
况春日載陽之候值文場賈勇之餘風
裂鮫冰煖浪搖杯中綠蟻氣衝魚鑰新
雷驅海外金鰲曲江柳眼窺人上苑花
神速客偏宜沉醉莫負芳辰於是移檄
步兵遠徵從事異味何須李監清尊許

坐公榮興逾飲中之八仙數減溪邊之
六逸合一龍而聯雙壁五星恰聚于高
垣醉斗酒而賦百篇七步豈難於擊鉢
各言舊雅載詠新詩倘誘玉山之頽定
申金谷之罰匪徒編成珠玉紀一時兄
弟綢繆亦以什襲縹緗貽百代子孫世
講慚予不敏敢曰先鳴聊爲初筵之粃
糠但負前驅之弩矢云爾

相逢猶憶十年前結社曾依淨土蓮夜靜虛壇
寒近斗風清疎磬遠浮天豈尋方士求仙藥自
掩高齋學草玄簾外烟霞雙白板燈前風雨一
青編交緣七子心先契誼重千金誓莫捐飛蓋
西園羞附乘揮杯竹裏笑羣賢秋堂榻爲徐陳
下春水舟因李郭連入室同心能有幾借光貧
女更堪憐句傳夢筆爭呈巧語擅雕龍各闢妍
倚閣並吹藜杖火臨岐先着祖生鞭那知分手
燕京裏竟逐浮雲越海邊望斷蒹葭人不見采
殘杜若鴈難傳關河遠隔春風面山水時虛夜

月絃路暗剡溪千尺雪夢迷天目萬重烟吳會
還飛令尹舄江頭喜泊孝廉船花前携榼空懷
昔眼底連枝悵未全牛斗星文神自合雌雄龍
劍勢猶騫公車偕上逢今日郎署栖遲已隔年
歲月馮唐傷易老酣歌方朔浪稱仙把衣稍敘
寒暄語聞笛番驚涕淚懸再尋舊館非前主相
對長檠共黯然往事祇看川閣水消愁須貰酒
如泉鷓鴣裘解沽瓊液琥珀杯浮映玳筵曲奏
梨園堪擊節談迴塵尾可忘筌豪來投轄傳籌

飲醉後欵巾枕股眠景運龍飛當九五才人鵬
奮起三千曲江指我曾遊處上苑看君奪錦鮮
富貴榮華真過眼蕭曹周召許齊肩致身寧羨
橫腰印不朽非關負郭田促膝莫忘今夜約殷
勤揮灑託鸞箋

與韓孟郁夜坐論詩詮敘其意得五言排
律六十韻豈謂進退古今必無紕謬然嗜
痴之癖何妨梁肉人各有見毋務黨同觀
者宜有以恕之

浩蕩千古心流連一壺酒堂虛明月夜榻下如
蘭友論詩窮奧秘藏抉樞紐微茫風雅前廓
落騷些後已將混沌鑿未覺鍼鉞剖至味出犧
尊古蹟存蚪蚪汾水敞逸讌河梁振詞藪東西
擅二京魏晉矜羣手朝華雖盡披夕秀足不朽
清聲陸機鶴淡色陶潛柳齊梁工綺靡隋陳益
昏部六代鮮洪鐘百曲應覆瓿唐誇沈宋妍尚
墮徐庾曰誰能挽頽波獨立衆匠首李杜並銜
轡王楊可驅走二曜奪星辰五嶽低陵阜更有

紫霞姿飄出青蓮右摩詰若梵唄應物如岩瀏
寂寥彭澤意復發襄陽口天籟薄絲竹仙裾厭
瓊玖獨遊蓬島外不與塵寰耦錢郎揚清風高
岑絕氛垢鳳簫乘月弄石磬迎秋扣粗豪韓退
之峭刻柳子厚苦心無遺力鏤骨時露肘因知
天工趣不在毛穎取賀全傷鬼恠郊島真窶叟
元白擊土鼓籍建鳴瓦缶晚唐轉織碎古法紛
蕩蹂飛卿倚門妓商隱濃粧婦禪宗入野狐執
圃生稂莠宋調嗤腐儒元曲鄙乳教冥行棄策

杖失路憐矇眵 皇明叶吹萬泰道回陽九金
石奏廣庭秬鬯揚清卣宗工醉醞醐下士覓滄
醜北地屹崆峒諸家盡培塿奔騰風震天要眇
絲穿藕元氣盤其間萬象罔不有衆喙任輸攻
長城堅墨守雄視實絕倫挺出固非偶信陽舍
津筏逞臆開戶牖陸離雉映波煥爛鷄吐綬終
屬片琮清那似長鯨吼豈宜呼伯仲止合稱甥
舅格律日漸移浮薄風相誘七子盟儼然千秋
知能否白雲與紫氣枝指復駢拇好畫失真龍

吠聲肯類狗相勉探玄珠毋徒珍救帚書期富
五車學必窺二酉夏蟲妄語冰航海唯占斗勿
失前哲規而開後人咎君看漢掌輕遠讓齊宮
醜芳菲槿易謝蒼鬱松偏壽調高和或希論定
傳應久余堂僅旋馬種蕙已盈畝閉關無剝啄
抱膝絕喧操君來連坐臥言出互彈糾莫嫌供
給薄折葵剪新韭

漱玉齋類詩卷下終



